

■ CONVIVENZA

Davart mattas, poppas e far beffas

DA FADRINA HOFMANN*

Ina saira a Vicosoprano en Bregaglia. Igl è ina da las emprimas sairas da stad. Nus essan qua durant la fin d'emna ed avain decidì da far anc ina spassegiada cun il chaun tras il vitg suenten la buna tschaina cun piz-zoccheris. Igl è idillic da chaminar sur la punt da crap, da vesair giu sin l'auai Maira e da giudair ils ultims radis da sulegl da quest stupent di.

Mia figlia ha prendì cun sai sia poppa. Ella è ina mamma da poppas fitg conscienziusa. La poppa vegn tgirada sco in dretg poppin, è vestgida sco in dretg poppin e posseda era tut l'equipament sco in dretg poppin. Felix – nagin'idea pertge che mia figlia ha tschernì quest num – è questa saira en ses baby björn e stuess dormir. Nus chaminain damai era tras vischnanca per che Felix possa sa durmentar.

Cun passar sperasvia a la scola vesain nus dus mats che giogan ballape. Els paran dad esser en la vegliadetgna da mia figlia, var otg u nov onns. Jau na fatsch betg grond stim dad els, mia figlia marmugna dentant suenten in pèr pass: «Jau sai ch'els ma rin ora perquai ch'jau hai cun mai ina poppa, quai è però tuttina a mai. Sch'jau giog gugent cun mia poppa sche na lasch jau prender da na-



gil plaschair da far quai.» Jau sun stutta da questa frasa, da ses tun decis, da l'egliada da cumbattanta. Jau guard enavos e gea, ils mats rin e mussan cun il det sin la poppa.

Lura davent jau pensiva. Na dastga ina matta da nov onns gnanc pli ir a spass cun sia poppa senza vegnir ris ora dad auters uffants? Fin tge vegliadetgna dastga ina matta lura giugar cun poppas tenor las le-schas da quests rambottels? Sto ina matta da la segunda classa propi gia esser uschè coola?

Mia figlia ma raquinta che sia meglra amia na ristgia betg pli dad ir a spass tras il vitg cun la charrotscha da poppas. Ch'ella haja precis tema ch'ils auters rin or ella. «Jau hai ditg ad ella: Nus na laschain tuttina betg decider quests tabaloris cun tge che nus giugain», di ella puspè cun vusch franca. Jau sun superbia da mia matta en quest mument – era sche jau bad ch'ella na sa senta suenten las beffas dals mats

indigens betg pli uschè bain sco cura che nus eran partidas davent da la pensiun.

Nus chaminain anc in mument, salidain auters patrums da chauns ed era lur chauns. Quels salidan schizunt era Felix, in bel gest che mia figlia quittescha dentant cun trair si ina survantscheglia da maniera ironica. Lura turnain nus enavos en nossa stanza tar il frar grond ch'è gist amez in «chat» cun ses amis.

Felix sto uss ir a dormir, igl è gia tard. Entant che mia figlia prepara sia poppa per metter a letg pens jau tge buna mamma ch'ella daventa ina giada. Ella tgira sia poppa cun amur e premura, ella sa precis cura ch'igl è temp per far sitg – Felix sa propi far pisch –, cura che Felix ha fom u said – ella sa propi baiver or da la buttiglia – e tge vestgadira ch'è adattada per tge aura. Ella quinta in'istorgia da buna notg e chanta ina chanzun per finir il di.

Curt: Jau sun persvadida ch'in dretg poppin sa sentiss grondius tar mia matta da nov onns. Ed jau sun era persvadida che gnanc ina poppa na survivess en la tgira da mats che rin ora mammas da poppas.

* Fadrina Hofmann è redactura tar la «Südosstschweiz» e viva cun sia famiglia a Scuol.